

四庫全書

集部

欽定四庫全書

集部

斐然集卷二

詳校官贊善<sub>臣</sub>朱 紱

主事<sub>臣</sub>呂雲棟覆勘

總校官編修<sub>臣</sub>王燕緒

校對官編修<sub>臣</sub>李堯棟

謄錄監生<sub>臣</sub>李元位

欽定四庫全書

集部四

斐然集

別集類三 宋

提要

臣等謹案斐然集三十卷宋胡寅撰寅字宋史作明仲此集題曰仲虎樓鑰序又稱曰仲剛盖有三字也崇安人本胡安國弟之子其母以多男欲不舉安國妻取而育之遂為安國之子宣和三年登進士甲科南渡後官至

徽猷閣直學士忤秦檜謫新州檜死乃復故  
官紹興二十一年卒事迹具宋史儒林傳是  
集端平元年馮邦佐刻於蜀樓鑰序之嘉定  
三年鄭肇之又刻於湘中章穎序之宋史本  
傳作三十卷與此本相合蓋猶從宋槧繕錄  
也寅父子兄弟篤信程氏之學寅尤以氣節  
著其晚謫新州乃右正言章復劾其不持生  
母服寅上書於檜自辨其文今載第十七卷

中大意謂遺棄之子不同於出繼之子恩義  
既絕不更以本生論之然母子天屬即不幸  
遘人倫之變義無絕理章復之効雖出於迎  
合秦檜假公以濟其私而所持之事則不可  
謂之無理寅存此書於集中所謂欲蓋彌彰  
也至於秦檜之罪罄竹難書而集中上檜第  
一書第規其不當好佛其細已甚又寅作崇  
正辨三卷闕佛不遺餘力資善堂崇奉佛像

寅至形之繳奏載此集十五卷中而三十卷末乃有慈雲長老開堂疏嚴州報恩長老開堂疏光孝長老請疏光孝抄題疏龍山長老開堂疏龍山長老請疏六篇尤未免自亂其例然靖康元年金人議立張邦昌寅方為司門員外郎與張浚趙鼎均不肯署議狀邦昌立遂棄官而逃建炎三年為起居郎時詔議移蹕之所上萬言書力爭其文今載第十卷

中紹興四年為中書舍人時議遣使往雲中  
又抗疏力諫其文今載第十卷中並明白剴  
切樓鑰序所謂引誼劇上往往有敵已以下  
所難堪者殆非虛語又上言近年書命多出  
詞臣好惡之私使人主命德討罪之詞未免  
玩人喪德之失乞命詞臣以飾情相悅含怒  
相訾為戒故集中十二卷至十四卷所載內  
外諸制並秉正不阿史稱所撰諸制詞多誥

誠至寅之進用本以張浚後論兵與浚相左  
遂乞郡以去其父安國與秦檜為契交檜當  
國日眷眷欲相援引寅兄弟三人並力拒不  
入其黨寅更忤之至流竄其立身固具有始  
末者其文亦何可廢也乾隆四十四年九月  
恭校上

總纂官臣紀昀臣陸錫熊臣孫士毅

總校官臣陸費墀



斐然集原序

長沙吳德夫間為予言胡仲剛氏學業行誼為世楷則  
出一編書名斐然集以授予曰其為我廣諸蜀子識之  
弗忘後守廣漢將以刻諸梓未皇然也厥二十又七年  
予歸自南旋起家渡瀘叙州馮侯邦佐已稔之求一言  
冠篇子又取而熟復之蓋自公遊庠序已深詆王氏專  
尚闢洛諸儒之學舉宣和三年進士教授西京國子監  
與忠獻張公同被薦召入掖中書靖康改元金人深入

與張公為當路策守禦甚著京師圍解始得省親荆潭  
建炎再造首以記注召還極陳三詔之不同論七事六  
條之利害娓娓數萬言如必罷和議必用君子必退小  
人必明賞罰必固本支必建藩輔必擇守令必討盜賊  
大抵監朕李汪黃誤國之不可再引誼廟上往往有敵  
已以下所不能堪者高皇帝雖聽奉祠而簡注不忘既  
狩錢塘申命記注首論四維不張惟刑是從利在尼雅滿  
則欲釋怨以悅其心利在劉豫則欲友邦以通其好文

定亟稱其得敷奏體張公以右相視師嘗議遣使公辯  
過懇至謂堂堂天朝相率而為敵國之陪臣蓋視胡公  
邦衡後日之疏有過之尋貳春卿兼掌書命如追廢  
王安石配享孔廟追謫章蔡誣謗宣仁后及褒表諫臣  
等事高文大筆大抵皆公發之暨趙張去而檜再相則  
公遠徙炎荒幾陷五十三家羅織之獄至檜死後得復  
官還里迹其平生任重道遠之死不渝實由文定為之  
父仁仲為之弟謀之家庭者固如此至其述崇正辯以

闢異端纂伊洛緒言以闡正學著論語說以明孔門傳授之心法讀史管見以扶資治通鑑數千百家褒貶之實最後傳諸葛侯世以寓其討賊興漢之心蓋公自宣靖炎興四十年間雖顛沛百罹而終始一說所以扶持三綱者其不謂大有功於斯世矣乎因馮侯之請摘其關於世教者著於篇端平元年九月戊申鶴山魏了翁

序

天之生聖賢也豈偶然哉昔者洪荒之世人物混并

賢不肖淆亂堯舜禹臯夔稷契所以致力於此者亦云盡矣叙典秩禮命德討罪皆天意也天之所以命聖賢者孰大於此五品之未遜五教之未敷五刑之未明是雖飽食煖衣果能保其生哉由唐虞至於商周天下事事物物凡當正名而辨分者無一之或闕及周之季聖賢之澤微矣聖如孔子不得位而無以行其志於是春秋作焉故曰春秋定天下邪正迹其功用不特被之當年實為萬世法程由漢迄唐大亂而後小治極

危而後粗安飢渴者之於飲食以為得是不啻足矣而聖賢用力之地鮮致意焉故朝夕之安不能銷百年必至之患斯須之快不能償他日無窮之憂昧者安之智者懼焉皇宋作興文治燦然百餘年間賢人君子所以推明乎是者固已昭昭乎心目之間過人欲之橫流彰天理於既泯士生斯時抑何幸也兵革紛紜天下學者渙散而莫之統一文定胡先生始以春秋鳴而其子致堂繼之見於辭章著於賦詠陳於論諫莫非極治亂之幾

謹名分之辨黜邪而與正尊王而賤伯明義利之分辨  
枉直之實取而誦之鑿鑿乎五穀之可以療飢斷斷乎  
藥石之可以治疾由其言以推其行事即其文以究其  
用心使其功化得盡顯於時則撥亂而反之正三光明  
於上民物育於下猶反掌也世方交競於利祿之途角  
勝負於得失之際滔滔馳騫不可救止古之聖賢所以  
孳孳焉者固已與之背馳矣此愚之所以中夜而起抱  
書而嘆也三山鄭君肇之持節湖湘得是文於致堂之

猶子大時遂取而刊之木夫致堂之為是丈夫豈知後世有揚子雲哉蓋其露縕與而寓諸言發憤懣而形諸書有不得已焉者鄭君之好尚亦豈為文章之美哉天理之明人心之正是書其標的也嘉定三年八月望日

南郡章穎序



欽定四庫全書

斐然集卷一

宋 胡寅 撰

原亂賦

始予納履于重圍兮期汗漫而遐征又眷眷而躊躇兮  
觀國光于廣陵方郊裡之先慶兮祥雲郁乎帳殿忽黑  
幟之連林兮朔吹激夫鳴箭瞻日隕于武林兮又浴光  
于秦淮何羲和之鞭車兮與吾願以或乖弔夫差于姑

蘇兮望兮踐于會稽送龍旂之翩翩兮怒雲氣之淫裔  
俯潮海之洋洋兮蹇吾行之不濟傷春心乎江南兮懷  
九辨乎三湘莽蒼梧之愁予兮顧洞庭而浩湯計北歸  
之幾時兮誓南征而徊徨星攸拱必北辰兮客子懷惟  
故鄉雖山川之信美兮非吾土以安翔結湘雲以為廬  
兮攬明月而為袂煮澗石以考槃兮樂琴書而卒歲曷  
斂迹之遙遙兮道未昧而孰睹鯨鯢翻于陸海兮曠野  
嗥夫兕虎掃欃槍于紫清兮翳黃道以榛莽廡四方而

靡騁兮民曷懼此怒也豈天運抑人事兮吾未聞其故也悼厲階之方梗兮誰不仁而落基泝頽波以討源兮我有云君其聽之監自古與在昔兮懿哲后之御極儼動作于威儀兮起風化于衽席故妹喜妲己兮滅夏商之祀飛燕太真兮頹漢唐之國何覆轍之荒忽兮邇聲色而縱極曼三十六宮之蛾眉兮承倩盼而弗憚慚栢谷之主人兮託富平之貴客朝賞酒乎新豐兮暮更衣乎綺陌湛露灑灑乎草茨兮孔鸞雍雍乎枳棘九侯爭

寵以迅衆兮五家競麗于淫泆靡夜宴而絕纓兮誇大  
庭而衷相寵光爛以相紛兮莫敢指乎東甍入聲故沫鄉  
采葑菲于要期兮溱洧贈芍藥于戲劇三綱蕩而淪胥  
兮此所以啓亂萌者一也人才不足以屹柱石兮法度  
不足以斥麗敬崇傾宮與瑤臺兮鳩班輸與工倕土賈  
埒于粟帛兮木林蔽于河渭梁珠宮與貝闕兮耀金塗  
而玉砌沙堂方連以蛾綠兮網戶縹緲而朱綴轟穹窿  
而交翬兮界天邪而鱗次前鍾鼓之未移兮後繩墨已

新制曾步游之幾何兮又改圖而更締眷蒼頭之下陳  
兮錫歌兒之外嬖近皇宮之秀色兮峙北闕之大第毀  
孤菴之室堵兮快狐鼠之憑崇激宏侈以交夸兮紛渠  
渠之莫計嗟赤子之流離兮或風雨之無庇竟不得以  
託處兮此所以失土宇者二也事遠畧于四陲兮闢疆  
境而孔貪收夜郎于已弃兮指青海而必戡建石泉于  
成都兮置真播于巴濞策振武于河外兮開古平于瘴  
嵐軍旅動而繹騷兮民呻吟而弗堪竊弄兵于潢池兮

繡衣斧以斷斬又使講于強敵兮航東海以揚帆遂渝  
盟而北師兮授兵符于老閭罄大農之陳陳兮飽虓虎  
之飢饒乃許口而調庸兮吏疾視而欲芟乖皇祖之仁  
術兮換幽薊以帑縑府廐何知于壁馬兮稱慶之觴猶  
未銜通烽火于甘泉兮突騎已漫乎關南隳廟祐其何  
救兮獵九土而血染微道德之安強兮此所以不戢而  
自焚者三也舉籍邑于四至兮闢提封于禁地視崑閩  
之規模兮壯天都之形勢作崔嵬之良方兮六五岳曰

萬歲笑祖龍之驅石兮憚瑤池之騁轡斷瑰特于太湖  
兮浮巉巖于汴泗後歲星其兩周兮崇葉莪于天際望  
峯巒之連娟兮瞰洞壑之遐邃跨玉梁于瀑下兮漾金  
沙于澗溪琺林日以劍拔兮嘉卉藹其雲萃移西域之  
蒲萄兮轉南海之丹荔空檀藥于江湖兮牛曳輦以道  
痺扛綺檻及雕籠兮殫文毛與彩翅豈中貴人之未稱  
兮又應奉焉有相使聳福威以享上兮十五里而博置  
盡動植之怪竒兮夫烏識其稱謂疇若予之虞衡兮日

千斛為鳥飼宜便嬖之自忠兮忍暴殄之滋熾或蕩析  
其家巷兮咸此物之攸致胡為阱于國中兮失一兔而  
與死比彼佞巧之偷樂兮方腰束夫金賜通權科于私  
門兮竊揮霍以如志邊塵空其既揚兮山猶覆乎一簣  
子及汝以偕亡兮此所以不能獨樂者四也海上燕齊  
之士兮神姦變化之語投耽肆以易惑兮遂服行而莫  
悟上天安得而矯誣兮曰李耳乃吾祖積氣何有于基  
高兮曰神霄其有府夫孰為此詎譎兮幻羽客慧名而



姓褚握符籙之小技兮駭恍惚于呼吐神光煒其炳夜  
兮雷隆隆而在戶赤劍鏗然電焱兮墮梨棗以如雨按  
神變之是則兮謂天地之神祇亦可覩降玉皇于圜丘  
兮出方澤之后土接萬靈于明庭兮紛肸鬩之延佇惕  
羣臣之薦恭兮閔下俗之聾瞽皇自躋于上帝兮七廟  
曷具孔俯敞千柱之琳宮兮兩帝君之攸處騰步虛之  
希聲兮廣袖颯以翻舞遂覃風于八紘兮黃冠紛其鶴舉  
排閭門遊禁內兮戶者莫之敢禦日再中不可候兮鼎

金餌而何補渺三山之安在兮奚用神之巨武豈聞異  
教之駁雜兮正座講于黌宇六籍危其不焚兮學士窘  
而如鼠痛人紀之俶擾兮強鄰固宜予侮既曩倫之大  
斲兮此將亡而聽于神者五也朝既列夫高位兮國又  
賦于重祿聖王所以俟天下之豪傑兮為億兆而作救  
彼刀鋸之殘人兮祇閻寺之役畜一身而二任兮達內  
外而妾僕資慘刻而厲荏兮示柔靡而含毒任巾車而  
秦敗兮殿國師而齊辱仰前古其一律兮禍必發于所

伏悼崇觀之已還兮乃卒踐于往躅班輔國之王爵兮  
建承宗之旌纛踵澄樞師傅于南漢兮晞令攷總兵于  
西蜀根盤據于紫闥兮奪萬乘之心腹以小善要君之  
諗已兮以巧思逢君之多欲外攘擅以肆行兮况奉承  
而加肅從媒狎于閨閣兮事繕營于土木攬尚方之工  
技兮莞靈囿之花竹司防扞于城闈兮導津梁于河瀆  
籍稻畝于塘水兮領修宮于洛卜資文武之二柄兮將  
相涵其恩育稱門生其未厭兮又申義子以敦篤口天

憲而慘舒兮脅不附己以赤族沛恩澤之四漸兮走貨  
賂而上黷逮僭亂之引咎兮勢已迫于指鹿昭廣陽之  
雙節兮飛燕頷以食肉惟籌蠶其無良兮百萬挫于一  
舛皇匆匆而內禪兮孽隸凜而頸縮就斧質于倉卒兮  
罪未書于獄牘雖少紓天下之憤兮已無益于顛覆木  
蠹盡而自及兮此親小人所以傾頹者六也姑置此而  
勿論兮敢請循夫厥初河源可以濫觴兮下流憂其為  
魚曾議道以持世兮申商術而施諸昔願治而更化兮

荆舒東夫國政詆先后之持循兮肇欲斬夫邦命憎鼎  
鼎之敦古兮工鑿之而鍛銷悅鄭衛之利耳兮罷希夷  
之咸韶陳王度以法律兮興太平于聚斂惡私藏之削  
國兮曰民富爾何僭日剝割而月朘兮民岌岌其愁阡  
城高危而復隍兮此損下而為漸飾六藝以文姦言兮  
假皇威而敷之示好惡以同俗兮蒙一世而愚之標榮  
利以為誘兮敕罰法以為驅何中人之敢桀兮謹迪率  
而取模又愴威於西戎兮拔將軍於利口俄斬將而軍

沒兮終兀擦於羌醜考氓利於畎洫兮嗣涇漳之古功  
茗莛權而奪商兮掘五金於地中瓌碎逮於手實兮籍  
釜甑與彘狗坐市吏以龍斷兮列賈肆而宴數何下漁  
之竭悉兮皇自富以九有行犖然而弗恤兮挾萬情而  
力揉夫孰與羽翼斯化兮哀細德之險巖斥忤恨之異  
己兮羣刺天而高飛久咸喻乎僻志兮般新進之合黨  
黜諫說之忠辯兮謂以私智非其上輔紫葉之遺老兮  
顓昊穹以血誠皇中疑而未決兮雩欲殺而示懲勢崇

成而權一分換斗魁而自幹闔闢洵其雷風兮喬木萎  
而先拔鳳知幾而高逝兮翔梟鷂而來巢赤麟不屑於  
好時兮紛孽狐之在郊縣七閩而弗績兮皇晚悟而瘵  
恫罷輪臺以富民兮授馬呂於震宮彼柏充亦何忍兮  
迷德意而弗將順忽龍胡之不可攀兮紛須厲以吾刃  
雖任姒之黃裳兮席晏粲於九載慘鍾山之死屬兮慕  
婚卞以無改卞先登而拔幟兮京背水而力攻一戰勝  
而奪國兮此蔡方之崇墉詭丕承之前修兮謂遂非為

達孝進興亡之大規兮曰汝詈夫宗廟皇不核其損益  
兮垂衣裳而聽之梟與狐其彙昌兮迄進退而證之洽  
韋布之美譽兮修禮樂之彌文茲誦播於要荒兮殫瘠  
惠之宰墳鑄九金以聚粹兮圖忠良為魑罔闢三雍而  
旌伐兮植衛輔以自廣劫特操以犴獄兮鉗民口以誹  
謗哀善類而網舉兮聯祖孫而流放襲貂蟬於幄內兮  
玩圭組於乳嬰著籍通於永巷兮家人紛紜以紫庭夾  
城洞以瀆流兮輕舟颺而小輦角與徵其合奏兮闕謏



慝之非淺總六害以自躬兮益蠱疾乎皇衷阿瞞肝膈  
之有要兮巨君肯休乎漢公冠沐猴於巖廊兮豺狼閱  
其相牙飛廉舞以夷羊兮白晝號乎鬼車歌桃李之成  
陰兮乃雜族而此等也迫荒耄而未試兮輻七首而心  
猛也兵氣躔於岱華兮橫彗孛於太微載頭顱而遽南  
兮前星升而闡威披穴窟於城社兮逐鮫鱷於潮海式  
拂除夫氛曠兮或碓鑊以俎醢予以天為可恃兮網不  
漏而恢恢豈霜霰之既零兮香陽春之不回少皇銳而

致理兮升陸沉之髦傑俾投戈於瀚海兮奠昭奇而未  
發士雲興而踴來兮願為皇而捐軀忍城下之盟辱兮  
誰出口而矢謨約質以皇之介弟兮約盟以朝之台衮  
獻服以國之冕輅兮輸器以廟之圭瓚周赫赫之南仲  
兮實獫狁之於襄我舊學之老傅兮何執計之不臧皇  
洞監其不任兮割邦寄於爰立傅忿懟而懷戾兮怵自  
營而增急終故恩之孿孿兮侍黃門而眷留荐呼吸其  
阿好兮與清議而為仇嫉導日之啟明兮彎大弧而落

之妒止車之金柅兮騰謗口而鑠之敵陽張而內恇兮  
虎臣蹙之以驅貔恥籌畧之衆誣兮得氣去而弗追愚  
自用而何燭兮禍方隱於旋踵舒施施而委蛇兮諛媚  
態以取寵么嗣子之讒僕兮方舞智而矯虔間乃翁之  
多猜兮罔上下而為後先斲畝蘭與晚蕙兮畦藝之以  
艾蒿蔭嘉樹以方榮兮逸殘剝之騰猱倘受和於三關  
兮何并門之淪陷又割分以大河兮何京師之環闕皇  
勤恤而旰宵兮駭顧輔而託疇何望傳以隆平兮博遺

台以幽憂二百年之洪業兮敵舉之如持葉沙漠漠以  
北吹兮悽孤城之遺堞妖魃出不惴人兮張楚坐而受  
圖欣藉藉而附攀兮猶老姦之黨徒自熙寧之師臣兮  
反淮蔡之維垣迄官傳之調護兮咸喪邦於一言坦周道  
之如砥兮今胡鞠為茂草過官闕而未黍兮塗黔黎之  
肝腦彼臨川之雄才兮妄仰儔於伊臯偶睿思之有作  
兮沕配合其自遭若賊京之巨猾兮尚得輩於林甫嗟  
耿耿之庸暗兮才闕葺而誰數貽大患之既彰兮曾莫

較其重輕嗟世俗之蒙欺兮或未歸之罪名亂與敗孰  
甚於此兮蓄萬古之遺憾往噬臍而奚及兮吾將為來  
者之龜鑑惟黃茅與白葦兮日既淹而就推習新說之  
小生兮亦寂歷於寒灰握京手而磨足兮紛淫朋之比  
德天勦殛而莫追兮又多淪於鬼域獨博黨之肖翹兮  
銜卵翼之類我班陸離其錯綜兮固幸時之軾軻膠投  
漆以締要兮縉汲井而必隨指九天而誓日兮憂一朝  
而顛隕辜少康之纘祀兮又美衛文與燕昭宣王遇宍

而側身兮漢光四征而勞焦偉哲王之英達兮撥亂世  
而反之正求豪傑與之馳騁兮掃舊跡於邪徑蚤發軔  
於場谷兮行萬里以為期選騏驎使伏轅兮駕玉輿而  
乘之建霓旌之千仞兮五色耀其相章騰蛟龍之竄畧  
兮驟雲氣而高驤詔豐隆使導路兮風伯屏夫埃昧役  
太歲而隸辰星兮勇有進而無退遂弭節於清都兮登  
通明而受朝跼蕩蕩而天門開兮羣仙侍而超遙樂九  
奏以萬舞兮執斗柄而斟酌調玉燭於四時兮備太和

於九洛曠下土之虐妖兮流虹氣與星精嘯涕為霖霖  
兮噓旱為螽螟帝有命以下討兮集海嶽之百職建修  
鋒而乘飛霆兮涵震蕩而翕晝威橫廓以雷迅兮歛掃  
滅而無蹤貌神凝而息癘兮帝不言而自功噫嘻乎世  
幽鬱而迫隘兮黨人曷其猶紛就重華以陳詞兮儻濬  
哲之予聞亂曰天道周如循環兮治與亂必因續吾端  
策而潔筮之兮得七日而來復

送吳郭賦

宣和四年江陵吳衛道求師於漳水之濱因遂稔熟亦復切僣逮庚戌秋脫寇難來湘澁叙舊道故又八年於茲矣聞湖之北稍稍有城郭村聚流散幸存者皆思還其故處一旦東書買馬慨然告別而去誦子路之言曰何以贈我再而三而益勤予應以可且問之曰子裏囊窶貧行乎凋殘之千里山川良是而無楚然似人之喜曷適其行而又曷以康夫至日之計耶衛道愀然曰丘壠所以不忍離而先人之敝廬庸葺而世業之常產所



不可不治也是三者泝而修之其必有序庶幾於苟合  
以不忘畀付則生於斯世又何慕矣予應之曰是之所  
志確乎本務然子故鄉荒萊蕪沒蓋有年所子將啟而  
闢之必有烈難之勩墾而畝之必有斷揉之利漑而滋  
之必有源泉之蓄播而稼之必有五種之美高下肥磽  
之宜風雨霜露之齊滅裂閔力之殊螟蝗水旱之氣於  
是有苗而不秀秀而不實稊稗之莫比者矣幸而登場  
春釋簸揚炊以釜甌薦以匕鬯乃不曰常珍而異饌之

嗜又有不知其味雖食而弗肥者矣故凡今人之田荒  
萊蕪沒不能自理至於流離漂轉仰哺待活以死於凍  
餒蓋不可勝計也子獨有復業之志惟本是力益既乃  
心勿中道而畫泯饑豐於糠菘毋輟耒而太息觀沮溺  
之避世察荷蓀之體勤懲宋人之無益考陳相之並耕  
問大舜於歷山訪伊尹於有莘若禹稷之躬耕與樊遲  
之小人孰為力稽孰為曠耘孰舍其田孰收其成用彼  
之効為我之績固將稻粱蔽疇稂莠不殖倉箱既盈時

萬時億鼓腹行歌醉於酒而飽於德也我未能有行焉  
敢謂老農之不如書以遺子辭曰餽贖倘可以為開荒  
之資乎

寄張趙二相三首

賢哲不同才論心則皆仁去就不同趨惟義乃可親仁  
非比周用推己以逮人義非楚越踈顧不私其身伊誰  
覺後世凜凜周先民姬公祖東山流言起斷斷召公發  
金匱王逆繡裳新它日夔有疑不悅公未遂予往暨汝

濟公語尤諄諄忠誠共白日勢利一飛塵姬家八百祀  
盛業兩公因其人不可見此意常自真吁嗟刎頸士一  
失為參辰我思尚友徒表此三千臣

昨朝觀抵戲千步廣場對甲也烏獲徒顧步熊虎態乙也  
乘勢來躑躅進復退或有敗甲心弦矢立其背甲初奮左臂一  
箭奮者廢甲復舉右股再射舉者墜坐令乙取勝或乃一笑快  
因思中山趙秦睨猶拾塊何為廉將軍恥與相如會不念國之  
存以吾兩人在一朝私仇破兩虎共穴內他年藺公薨頗老仍

見代坑兵四十萬大福遂不再依然卞莊子拱手視成敗  
河出崑崙墟江出岷山底涵涵受百瀆滾滾經萬里水  
惟準之平而德鑑之比離堆與砥柱何事中流起坐令  
平者傾復使明者滓臣門雖如市臣心要如水勿為砥  
柱激乃作天地紀在家而有怨惟舜處父子在邦而有  
怨惟且憂室毀夫豈忿愆哉過是非天理蕭曹貧賤交  
隙自將相起迄能除芥蒂至死相推美彼亦何所監覆  
轍有餘耳同時秦漢人異趣百代史

題浯溪

戎馬胡為踐神京翠華東巡朝太清

乙巳辛東以謁老子為名

扶桑

日出湧少海虎符百萬屯雲興皇威意無窮髮北老傅  
坐籌自巾幗謀臣猛將俄解體吹入胡笳一蕭瑟塞南  
莽莽多穹廬塞鴈年年不繫書回首朔雲清淚滿傷心  
玉坐碧苔虛中興聖主宣光類羣材合畝風雲會會稽  
甲楯今幾時於鑠王師尚時悔最喜鄴侯開肅宗不謂  
晨昏急近功竟使大唐宏業墜豐碑有媿昭無窮徒倚

碑前三太息江水東流豈終極頌聲諧激不為難君王  
早訪平戎策

和范元作五絕

馬遷法左氏實錄繫日月孰傳經世學儻可論絕筆  
久矣闕大音無譏郇以下一聞入聖處萬古洗凡馬  
種學根不深履道乃郵傳欲收反約功必也破萬卷  
挾策博塞殊愚智相千萬反躬誠且樂此事要早辦  
閱書五行下未勝百迴讀至道一念存請事不遠復

和韓司諫叔夏樂谷五吟

布被

昔年司馬公清德如伯夷  
簞瓢不改樂又似吾先師  
平生一布被天地乃吾知  
豈比平津侯挾詐坐受嗤  
公今蹈前修自適性所宜  
不受寒暑變炎涼但相推  
彼美錦繡溫蒙覆真虎皮  
愧非三絕手何以嗣銘詩

竹枕

故鄉清渭濱一節取君子  
相從大江南展轉秋風裏  
清



慵笑玉便傲兀勝隱几屏山煙景媚醉倒日高起此君  
通晝夜俗士乃輕鄙願言一奠枕四海春睡美磴磴孫  
子荆未便洗吾耳得意大槐宮古今真夢爾

瓦爐

靈臺淨含光虛室自生白縹緲沉水香瓦篆青巒巒何  
用金狻猊浮動羅綺席緇黃手闕兒女衣篝僻一從  
戰塵漲岱華風烟隔君臣若際會至治發明德普熏遍  
十方氤氳本埏埴何人學孔禱鼻觀久已塞

蒲團

少年慕簡冊編蒲抄古書有聞未能行常恐速厥初青  
羶雪窗夜卧起卷復舒歲久亦穿穴客冷不及渠知公  
已坐忘物我歸如如黃團穩疊足繡茵一蘧蓀傳聞伏  
蒲諫天子懷每虛出處諒未免裹輪駢鋒車

紙帳

細皺卷寒波輕明籠白霧何以相徘徊歲晚正凝沍枕  
歌一尺竹被展幾幅布賢哉楮先生不以貧不顧夜玉

圍紅綃羞澁強自賦書生說富貴志士安貧素風鷲銀  
海潮春在明月庫先生睡方濃不覺糟床注

送黃彥達歸建安

漳濱讀書夜復日十七年間駒過隙相逢忽認語音存  
面皺髯張都不識歲晚懸鶉百結穿坐寒我亦無青氈  
少時意氣今何似對此猶能吸百川北風草木傷遲暮  
秀嶺長松色如故須知憂道不憂貧莫厭儒冠羨紈袴  
坐悲四海方橫流長劍未試心未休寄語幔亭雲外客

他年終約紫霄遊

題全州礧岩

癸丑

蓋山峯屨屨灘水不得出澗壑相奮撞竟朽此山骨想  
其初洞達借勢有神物臂開青石壁黥烏龍窟奔流  
成長溪岩洞寒突兀秉燭千步遊怪景纔彷彿華髮結  
乳頂空翠誰掃拂石田耕未熟石鼓響不沒靈仙眇羽  
化古廟凜紆鬱我來庚伏初弄水解纓紱清甘流渴肺  
妙聽含鍾律兩腋御冷然回首歎飄忽

示上封長老洪辯

濯足瀟湘湄，瘦藤拄衡岳。尋山半吳楚，何意得雄邈。青  
冥幾石級，屐齒響犖砢。低昂度翳鬱，軒翥見披剝。下視  
千萬山，碧海潮初落。無風浪自鼓，浮動涵嶽嶽。誰云地  
南傾，鼇足有蹠踔。請看高幾許，天近只一握。高寒變沖  
融，三伏謝焦灼。羣松何人種，凜立傲氷雹。况彼凡草木，  
跋望難遮著。精廬憑佛力，雲外聊自託。上方連兜率，下  
界指蝸角。道人洪河辯，萬卷歸領畧。湯休以詩鳴，澄觀

老禪縛相從塵垢外一語符啐啄愁雲結蒼梧來雁眇  
燕朔鄴侯有舊隱此興吾數數不須理牙籤借問有三  
學

示高臺足菴紹印

萬生紛綸墮速網誰能自拔起情想隙塵初傍陰色空  
燒草又趁春風長將身出家叅佛祖此病中作膏盲養  
足菴道人肯珍重不與凡流較斤兩彼方彈雀棄隋珠  
我自舍魚取熊掌高臺平抱石廩翠古轍下轆雷溪響

粥魚齋鼓不經營竹月松風靜來往定心古井波浪息  
夜氣靈源襟韻爽憶昔幽尋度雲壑見投佳句論鄉黨  
豈惟高格擅風騷頗信中局得平廣轉頭塵事還匆匆  
入夢勝遊真莽莽山梅有信寄一枝更欲青鞋快真賞

記夢

夜夢虛齋整衣冠客五六輩相揖還中有一人少留連  
叩簷叩齒禱甚虔顧謂吾儕曷傾耳紅藥叢深鳥聲美  
翻枝颭葉縹緲間俄有珍禽集雕欄宛然小鶴未省見

羽翮紺碧光爛斑凝眸一瞬觀對立忽成四鶴齊飛入  
赴予紛泊若投林藻錦縈帶復動衿綠毛么鳳只倒掛  
翠襟鸚鵡空好音或將攬取不從手相視眙愕萌爭心  
吾殊無言行且睨與客徐理出戶意徘徊八翼疑驟鸞  
雛選諸儒競連袂不知剝啄誰扣門推枕高樹晨光暎  
示能仁長老祖秀

此世未可出太虛無古今一塵絕點染萬象羅蕭森白  
雲從何來舒卷亦無心流風散遠影花雨釋重陰俄然



際碧海條爾歸遙岑方來詎可執已去誰能尋何人知  
此意魚鳥徒高深道人乃如許洒落湘之南冥鴻豈避  
弋倦鶴亦投林昔年淮泗間清譽喧佩簪石塔縫無際  
鹽官鼓無音衡山亦何有神廩供爨藟十年一紙衲線  
線穿金針上方萬壑外微笑開我襟幽懷久自契俗慮  
何由侵攀蘿共明月流水寫瑤琴

題能仁照菴紹亨所建

福州多僧天下聞緇衣在處如雲屯何人能了一大事

金剛經卷之三  
卷一  
齋魚粥鼓徒紛紛雲中復表第二月何異汙渠鑑毛髮  
不獨詩人水鏡昏定知佛祖龕燈滅道人竭來南山下  
蓋頭隨分茅一把菩薩果地已孤高石廩峯前更瀟灑  
草菴初就來乞名試往尋之水竹清莫訝此菴安四壁  
大千沙界總分明觀君所至金碧煥公才利用如澄觀  
隣僧無賴苦侵疆何似古人不爭畔從他三毒痴貪嗔  
我自元無一點塵攜菴南北東西住萬象光中獨露身

送余澤還義興

挾策漳濱兩韶稚君後南隨州計吏相逢冠歲璧池頭  
頓覺詞華使人惴謂宜雲路恣騰踏豈料霜蹄多蹶躓  
君才視我十倍加蓄積那堪五經笥已窮孟軻不動處  
得喪窮通歸一致每懷會合未曾欸輒復鴻燕春秋異  
寸莛才欲撞春容不盡之音耳空記去年邂逅得所願  
十里過我少停轡圍爐燒栗忘夜分麈雪訪梅喜春至  
窺園細看百卉動涉榭滿挹千峯翠讀君舊詩黃鍾律  
觀君新德清廟器默求至善不近名下視羣愚非飾智

常虞涉世傷坦率見語躬行合謹細值君隱憂方食蓼  
而我美疹如絳臂飛觴引滿不復能戰飲吳門夢中事  
采菊聊同茗盃清丸艾時歸藥婆利忠言贈公豈肉骨  
益友貺予真補劑浮雲聚散古則爾人生出處孰無累  
聞道雙珠已候門便乘一葉同插翅朱樓婉婉托旅夢  
江樹霏微攪離思一區衡山勿負約三絕麟經更涵粹  
得時而駕諒不免有使且寄相思字

送朱翌赴召

青松出澗底志已棟梁具平生飽霜雪歲晚中尋度屈  
伸諒有時窮達係所遇如君才與學八面有餘裕志修  
文自昌身既守愈固已甘韞匱藏寧願莫邪鑄急趨冠  
蓋林萬里便跬步時來則卿相慎勿負平素霜繁千嶂  
晚天濶三江注倘遇子陵臺為我一回顧

與范信仲及嚴陵同官納涼萬松亭

黃堂無徒真面壁休暇相招出城北

一云北  
城出

千岩窈窕

萬松豪把酒觀碁得終日此邦前修邈難繼嚴范千古

堂堂色用之折筭皆羌戎否則持竿弄泉石我才濩落  
何足道行藏未有資身策公當長嘯起家聲雲臺高敞  
風塵息

和信仲餘醪

化工收餘春不令寂寞回殷勤三月盡更放名花開燦  
然白雪姿亂洒青雲堆奇香滿深院冷艷絕浮埃弟昆  
林下蘭執友嶺上梅何年蕊珠殿移根畫堂我邂逅得  
佳客開窗設尊壘檀心丰采展更著紅燭催惜無傾城

髻斜插一枝來賞心不可奈折取浸瑤醅可憐清夜闌  
疊鼓如輕雷空簫發夢想雲雨下陽臺櫻廚未羞澁高  
會意重陪花魂入詩韻屬和愧非才

和吳元衡

先生頌酒夸兩豪使我讀之如飲醪詩情不遂春光老  
春在毫端尤婉好頗聞下堂小不佳未欲頌公長者車  
不道芳菲成一夢滿城寒食藉梨花便把千峯名擬峴  
同撥新醅酬闕典

金史卷之三十一  
卷一  
和元衡送牡丹

春工知君亦好奇倚檻山丹開壓枝山城何人識國艷  
中州對此稱花時新詩秀色搖京洛詞鋒生使侵疆拓  
金明釣賞思見之貢花驛使來莫遲

題永州東山西亭

辛酉

此亭得名從子厚琬琰一篇傳不朽我來相望三百年  
誤使承流稱太守初無施舍慰民心漫有詩歌誼衆口  
東山妓女北海尊歌舞春風醉花柳欲凹面勢直西南



更植脩篁遮培塿卷舒雲雨襟袖間濺浣冠纓塵土後  
近聞王師頻奏凱勅敵不復窺廬壽吾君神武光宣上  
將相宏畧方召偶遄歸北狩定有期開拓中原宜無手  
顧子疎懶歸意迫當世功名息心久寄言悵望獨醒人  
欲報厚德乏瓊玖遙山蹙黛酒如江勸我日飲無何有

題朝陽閣

瀟水東來北流去宛宛山城挾江住城中萬瓦蔽雄觀  
江外千岩自幽趣朝陽近止瀟之西繫舸捫苔上石蹊

翠壁劃開光黠湛高蘿垂覆綠冥迷排岩闖水飛欄出  
挂插洄潭老蛟脊渾疑海蜃噴珠宮復訝樓船褰繡帶  
鳴鸞佩玉不須論西雨南雲手覆翻寄語子牟來獨夜  
試看天闕瑞霞暎

題永倅廳康功堂

政拙催科永陵守實賴賢僚明可否邦人復嗣海沂歌  
倉廩雖空閭里有功成將去朝日邊更闕虛堂得晝眠  
後圃花好初著土前簷新竹已參天貌貅未飽軍需急

赤子如魚釜中泣若知王業在農桑國勢無勞憂及及  
酒闌四壁讀前碑吏隱猶勝五馬隨千古濂溪周別駕  
一篇清獻錦江詩

送茶與陳霆用賈閣老韻

閩相渺天涯新茗誰與促對茲火雲候漫說酒千斛要  
須臨水榭滿啜一甌玉冷然生兩腋萬里那更僕想君  
坐茅齋口授汗如沃飽餐先生饌睡思莽難逐玉川亦  
何有撐拄文字腹遺餉良未多精品端不辱

用前韻示賈閣老

壑源春未回已著金鼓促爭先入包匭價比金盈斛何  
人敢潛睨奉御食惟玉草薺空有名氣格臣與僕緬懷  
侍凝粹苦口同啟沃散仙今得伴鸞鳳相追逐雪泛定  
州甕澆此飲河腹飽食慚太倉那復驚寵辱

遊雲湖

衡湘久未往眼到山輒對愛山真自性久看眼未礙今  
朝渡石潭蘭漿亂青帶初升岸稍高忽喜地更大行行

兩垣間沙路得平快豁然見良疇小覽百里外涵溶趙  
家汙千頃疏幾滄人家隔楊柳或映桑林背連連麻麥  
墟雞犬達鳴吠宛如京洛郊北望一悵慨古城誰所築  
隱隱僅如塊娉婷九家藏巧緻六寶在想其夸壯時豈  
念遺迹晦主人隴西生懇欵具鮭菜墅前稼尤美彌壤  
黃雲曬雲湖從此逝日暖風不噫循岡逶迤登呀口駭  
瀟沛是名湖西缺節縮有石埭舍輿尚盤陀漸見湖尾  
派菰蒲傍籬落獵獵村沽茆曳笮大隄長堤址屹然塞

胡床羅四五植傘據其會恍若畫圖張綵筆窮物界滿  
奩開玉鏡萬象自清汰浮光散鷺鷥沉影亂鱗介紛紛  
漁舟子點綴助姿態其心曾未閒詎比觀者泰東頭輸  
寫處百丈走霜瀨匯為碧泓深嚙漱垠岑壞非茲兩雄  
竭何以鎮橫潰尚云春水時雷注聒天曠田翁亦好事  
巨艇遣迎載山陰興則同所訪何必戴招提有豪客置  
醴久相待歸途瞰烏泉船首滯葭菴未樓亦近止欲住  
思中敗刺竿小彎碣迴眺長嶺背峯巒未可窮却過陳

家滙幽尋何所得憩倦茂林最迴船漾中流矜腹思勇  
噉羽觴凡五舉銀鯽繞一鱸山氓爭睚眦窺覘互驚怪  
桃源果何似此地良足愛要當建亭榭聊復藝菘芥賞  
心浩無涯羲馭慘欲退吾儕幸強健勝踐莫辭再人生  
貴歡娛世俗苦埃璫黃君早交友聞善肯相誨楊君素  
疎豁為善克自裁李君更清苦有意飭紉佩彪君知勉  
勵不但聞梗概惟余真潦倒道退齒徒邁從游亦何幸  
魚目慙明琲誓言來年春景物重華絳荷花千葉裝一

金華山志卷一  
一青羅蓋蒼兼沒大浸碧巘搯芳藹遠陪鷗鷺羣坐笑  
桔槔械仍須少留宿促駕古所戒持鈎不求魚何用五  
十捨優哉復悠哉此樂未為太

示龍王長老法讚

東峯峩龍頭西嶺掉其尾蜿蜒藏爪鬣雲卧久未起誰  
憑象教力掛腹千柱啟重天飛鐵鳳寶地按金指於今  
幾百年松栢合抱峙悄無車馬塵一徑渺雲水我來亦  
何事蠟屐自遊徙讚公好禪伯道俗共懽喜浮雲本無



心錫杖聊壁倚借問此山名其實安所止答云蒼岑頂  
萬觴湧清泚伊何司蓄洩神物宜在此又言干戈際流  
血幾萬里龍胡為自珍岩洞深伏弭笑挹香松槽漱盥  
白玉齒清風出長嘯月淨天如洗

示龍王長老法讚用舊韻先公佳城與寺相直

堂堂感麟翁耿耿跨箕尾已垂百世芳何用東山起平  
生夢奠處鬱鬱佳城啟禪枝附奕葉魚粥常干指老龍  
卧頽波秀木森疑峙堆螺沃黛山瀉玉攬金水上人一

錫柱心寂倦他徙我亦希子文仕已忘愠喜時來語道  
要中立旁不倚而君樂幻空說定不說止永懷先覺人愧  
發汗流泚彞倫出筆削一是無彼此修程不自勉九十  
半百里相彼巖世芬所向輒搖弭未知吾相馬異質遺  
毛齒更須求真龍萬古資一洗

賦韓叔夏雪齋

君不見齊王禁宮夸孟子瑤殿珠階千柱故只知歌舞  
暖娥眉君未能賢寧樂此又不見玉局文章萬丈光七

年忍凍吟黃岡忍騎白鳳凌天去江上空餘一草堂不  
如衡山樂谷藏春風明窗小閣地爐紅物自涅槃分淨  
穢我方漉眼閱窮通夜驚山竹珊瑚折起愛溪松濛曉  
月塞驢烏帽去相尋可但子猷清興發

和仁仲歸鄉有感

癸亥

大堤蜿蜒挾江長卉木同泛春風香青青嘉蔬不用買  
采蘋烹滷皆堪嘗豈肥豕脂白黑正酒美魚賤吞江鄉  
豈惟物產具豐好地勢固可爭雄強歸來作賦興不淺

一飯美芹心詎快

登南紀樓

西望巫峽峯東望洞庭湖南望大江橫北望楚王墟  
平時十萬戶鴛瓦百賈區夜半車擊轂差鱗銜舳艫麥麻  
漫沃衍家家足粳魚深山雞犬接誰復識於菟挺禍者  
何人火獵而兵屠庚戌日南至渠魁宴宜都一膾八百  
姬坐無羊與猪葛伯殺餉童湯征自亳祖恢恢天網漏  
莽莽一紀餘遺民百存一茨棘伏且逋有田不敢耕十

倍出賦租籍戶析丁口奏言民數敷一縣三十家一城  
三百廬指為太平象蒼穹焉可誣翩翩兩孤鶴歸自青  
海隅長松雖好在池圃傷榛蕪邦君能好客授館高明  
居春風搖宇宙慘澹心盤紆玉花暗寒食桑穀凍不蘇  
流民渡沔來曳牛負其孳似聞倣擾中復有紅巾徒轆  
轤隨鄧間厥意知何如古來上流地最重荊州符形勢  
在東南橫跨此其樞皇文不用武重閉聞勇夫要當強  
楚蜀莫使窺全吳滔滔江與漢晨夜朝宗趨天聰方四

達廟算有良圖

題關雲長廟

西方有幻師以利行幻術利他乃甘言自利則其實曾  
微證形象顧喜論恍惚可憐億兆人明智百無一泯然  
俱受給寧以鬼自怵疑怖既迫心祈禱便屈膝千載浮  
屠氏箇箇提一律雲長忠烈士蜀漢凜三傑許身初擇  
義遇主益秉節一受先主知不為曹公屈最後圍樊城  
許南已無拂智畧孫吳儔議徙股膽慄惜哉片言戾壯

志遂紆鬱至今想英風使我竦毛骨廟祀禮則宜為國  
有典秩而彼天台僧相此山水窟欲繕廬而處假靈宣  
鬼物章鄉城近止將軍此焉沒斯人兼畏仰吾計行可  
必唱云暴悍魂岩壑擅營室從吾受淨戒父子歸命佛  
初猶未赫烜靈響沉寂謐奈何無盡翁作記極詞筆一  
毛成萬鈞財施日盈溢精藍敲千柱城旦洵溟渤捐身  
養情游小智之所弗而况正直神肯徇智顛汨永懷王  
迹熄異說競蠹出聖言甚微眇學士迷祖述佛徒竊其

柄高坐弄拳拂翁張性命說自謂了生滅孤標類清遠  
陰趣盡攘奪凡民何足算吾黨是可嫉終始莽如夢變  
化暗若漆矧希有漏因便怛無常猝推波而助瀾司寇  
莫能詰豈惟茲一廟淫祀如髮密誰將驅緇褐南畝界  
巾幘幽明無倣擾典祀不相昵坐令宇宙間禮樂興炳  
蔚

和仁仲孱陵有感

奸雄乘亂謀稱帝不暇從容問傳器荀公死坐斬殊錫



文舉誅因白畿地金根曲蓋乘五時謬以踞火尤吳兒  
懸知以鼠睨漢獻終欲搏噬如飢狸吁嗟白日蒙浮雲  
豫州奮臂提孤軍虎熊爭先氣烈烈魚水相契情氤氳  
赤壁端如殲二陵於操猶或稱其能身在行間一交戰  
阿瞞始信河難馮仲謀亦恃江濤漲豈憂炎德終淪喪  
孱陵自駐遏吳師要知身繫蒼生望丈夫蓋棺事方休  
未報平生宗國仇英雄安得無塊土固令於此分荊州  
春風吹花不濡滯綠滿郊原何救翳前漢興隆後漢頽

永懷啓沃臨行際

和仁仲遊桃源

桃江穩揖蘭舟渡，記得劉郎有仙路。未能趨海訪神仙，  
且欲沿溪看紅樹。釣竿已自憫羈束，平生况得滄州趣。  
最欣傲吏輕儻來，擬學淵明賦歸去。與君一問桃花宿，  
豈但行如武陵暮。伯陽八十有一篇，立教清淨貴自然。  
神仙之說何所始，虛怪汗漫無中邊。漁郎迷路去家久，  
雖踐勝境終迴旋。雕辭飾實好事者，至今千載猶流傳。

寧聞自古有仙人茂陵垂老一語真豈伊冠履薦紳士  
惑溺不異蚩蚩民誠能御氣友造物陋彼蟬蛻悲埃塵  
想見桃源之楚花正開牧兒模管吹出芳林來不知人  
家尚幾許雲屏玉帳空悠哉霏紅泛綠竟杳杳我亦乘  
興山陰迴不如與君歸種待黃實成蹊畫永無地生蒼  
苔

歸舟濡滯示仁仲

扁舟下荆江信宿七百里少繫玉州岸翠壁紅樓起提

攜桃竹杖飛步同徙倚永嘯來長風極望際天水登臨  
興未窮歸思孰能弭枕湖駕高浪萬頃期一葦飛廉不  
借便進尺或退咫莽蒼入葭蘆回環亂洲沚刺篙力言  
匱挽纜路仍圯物用各有時暮盍未可鄙風水亦何心  
邂逅乃如此快意得濡滯羸縮固其理子文三已仕了  
不見溫喜斯猶未稱仁胡不聽行止南山定非遠風駛  
一帆耳攜壺上翠微旅瑣為君洗

過方廣不遇主僧留示

甲子

崎嶇攀確梁復砭頰肩四力流汗扛笋輿軋軋三十里  
乃值道人遊近邦倦軀且借禪榻卧仰睇傑閣丹青麗  
泉湍夜挾風雨壯撼床殷枕如濤江晴巖空濛染佛髻  
白月皓皓團僧窗高杉大松間修竹烟旌霧蓋參雲幢  
要須酒壺綴羊羝哀蕭怨笛歌鬟雙緬懷東岩謝太傅  
提攜靚艷凌崆峒不學香山白居易只與如滿相敦龐  
想君聞之笑且哢西東分流嶺頭瀧歸來亦復有何好  
方寸坐以鐘魚降留詩六反皆震動魚誰考擊鐘誰撞

和叔夏海棠次東坡韻

久矣心灰形槁木有爛錦衾誰與獨殷勤調護得繁枝  
抹黛施朱盡凡俗池上靚粧開曉鏡露晞嬌潤離湯谷  
佳人得意矜絕代陋彼牽蘿補茅屋真賞幸逢尊有酒  
清玩可使食無肉十眉彷彿畫難親百匝徘徊看未足  
兩旬綠秀承紅嫩一日籬槿何能淑朝來但覺花照眼  
夜去不夢松生腹休誇艷杏蔭白鷗漫說天桃夾疎竹  
固知尤物人共愛也使先生動心目老坡有詠記江城

少陵無句慚巴蜀，顧我荒詞陪絕唱。何異斥鷃追黃鵠，  
夜來風雨太豪橫。惆悵遙峯紫度曲，不如却賦黑牡丹。  
寄語孔翠防抵觸。

和彥達新居

喜居夏屋成，竹樹護燕雀。門徑眇雲水，亦見輪蹄錯。君  
本有用才，魏匏自濩落。平生五車勤，歲晏一簞樂。永言  
青眼舊，每笑春風薄。共保貞石心，火炎豈能鑠。激志山  
岳聳，放懷宇宙廓。過我雖踟躕，拄杖得所托。但慚城市

遠兼味止葵藿方羅玉塵揮忽聽金奏作薰然陶天和  
寧復慕人爵澹泊道義交已謝勢利作遙知尊杓存酒  
熟待同酌

寄題義陵吳簿義方堂

萬生天地間靈者乃知義何獨於義明而利心亦熾茲  
焉分兩軌君子小人異秉義一毛輜百川利趨亟紛紛  
冒貨賄役役奔勢位資之以狼貪攘之以螳臂深較毫  
釐差交攻兵刃剗大賈五百金徙蜀死無庇小偷慚簞



簋褫魄對犴吏一生幾量屐身後糞土棄夫豈無良心  
習慣遂殊致試令呼之跣悍目眦然視又或號之夷喜  
笑亦隨至也知清譽好寧自濁汙置頽波日不反方跣  
尚當愧有美短薄賢老矣能劾惡善為子孫謀闢堂寘  
經筵松筠歲寒色不種春藻媚柳山固竒變其江瀉青  
翠盤礴以蜿蝓淑氣宜產粹是將出秀民庸稱名堂意  
願言承學子不受流俗漬雖共雞鳴起拳拳閔顏志本  
原孝而恭由此充其類附翼而攀鱗四科有陞次或誇

說遇功固恥與之比何況浮雲侶秋露草頭墜勿忘先  
師言亦何必曰利

和仁仲賞梅

萬竅鳴飈風千秋厄嚴雪花心獨沖融足以耐愁絕太  
和起孤根枝上見明滅稍稍占芳辰時時破苞結天葩  
忍晏粲餘卉盡騷屑培植幸逢賢主人平臺翠竹承清  
薰要看千樹挂山月肯把一枝縈鬢雲輕風休吹落續  
紛待我詩成酬繼君飛觴半酣未忍去詩情花氣相氤

盃須知魏夫人元長姑射神吐哉趙飛燕况乃楊太真  
但願華筵對晴昊年年領袖百花春

赴德秀海棠集

丙寅

穿山復履膝忽望翠林杳漸近一崦環茅簷淨而小赴  
君雞黍約仍被酒壺繞爛爛庭下花迎予遍開了誰將  
淡燕脂染雪團枝裊枯基忘勝負響鐵聽窈眇煩襟浣  
一笑至樂如此少愛君富才藝守約自強矯諸子如松  
筠意氣在雲表幸是田舍隣不作離別悄

斐然集卷一

欽定四庫全書

斐然集卷二

宋 胡寅 撰

和劉彥沖白髮

避炎掃淨室卧看浮爐烟讀君五字詩鶴髮驚臞仙緬  
懷少壯日意氣橫無邊春風鬪雙髻綠草爭芳妍酒豪  
既跌宕花惱仍狂顛涉境如刺繡針行久忘邇中路一  
線通悟彼稱世賢不知老將至此道聞尼宣高山戴雪

早從人嘲樂天青青復種種榮謝理固然市翁一彈籥  
意眇飛鴻前何況大丈夫乃顧兒女憐為語倥傯輩癡  
心莫攀綠裏蹠諒可鑄此物無由玄

醉步前溪示彥冲

溪南溪西渺雙溪中有良苗綠千畦參差人家傍脩竹  
隱約負戴道山蹊南溪先生冰雪胸虛堂坐詠荷花風  
西溪散人晞汗髮半夜泉頭飲明月欲賞奇文析疑義  
蘊隆當路不可越安得阿香輕著鞭驅龍喚雨玄雲邊

徑携枕簟就公宿對床飽聽秋聲懸

和彥沖三日飲

名園直萬金一頃連芳蔭秀巒千尋直鹽石井百尺深花  
殘尚聞鶯林勝不留鷺時來覓清暑却扇涼沉沉三盃  
有道通萬戶無法禁平生師洙泗正爾戒已甚相彼無  
漏學亦復忌踈滲紅顏不肯駐白髮來寢寢洗心聆妙  
語至味良足飲常聞麗澤兒美潤相灌浸淡交那甘壞  
諒直靡讒譖此歡屬吾輩端匪異人任又憐囁嚅子有

口終自噤不若更歌呼醉挽溪流枕

又和早飲

零露溥溥風滿塘美人不來儼分行天葩艷然出翠被  
倚檻嫋嫋傳秋香對之索酒飛觴快浩如一海朝千派  
主人絕倒任忘形接籬便向三花掛狂夫未是詩酒豪  
先生卓爾能禪逃忽聽雷聲起淵默坐使萬竅皆呼號  
自開善寺飯已赴彥脩之集新陂初成次其韻

早氣欲流石澗溪失盈溶況逢青田渴萬鍤決使東南



山思照影三日雲氣重玉妃忽墮地行君竹林中潤騰  
百年樟翠寫千丈松澄之新塢橫淨綠涵秋容是日看  
雨花一香萬緣空歸來趁清約賞心還此同桂枝耀三  
更裊裊來天風名觴或可醉警讀安得慵永謝世味醺  
敢懷歸意濃朝懽過狎洽夜氣方沖融意超謔浪表伊  
誰躡斯蹤獨愧和篇斐不堪稱兩雄

賦吳守友石臺

南圃繚粉牆幽徑便蠟屐蒙然遇高蔭炎景不予赫天

成一高坳為印子雲宅大藤如蚪龍陟降蜿尾脊青冥  
牽茂葉何異張翠帟想見春風時紫蕊濃可摘富哉他  
山骨輦致羅鐵碧或如爨桐斷或若林筍刺或如五老  
拳或若大華擘或如虎方踞或若獬欲躑或崎難著足  
或坦可敷席或倚以憩憊或坐以對弈廣輪兩拓手叢  
秀不迫窄何須後猊座方丈出戲劇况論芥子中不與  
須彌隔有之則似之知君介如石石中有良玉終古不  
變易茲遊謝蘭亭何用嘆陳迹

示吳守

汲湔明月泉散襟清風亭秋陽不能暑宿酒爽以醒佳  
哉此勝原歷覽所未經一溪曲折白萬嶂低昂青上有  
蟄龍漱比渭不比涇天邊建河漢地底奔雷霆物產不  
儲秀伊誰當炳靈早負李固笈夜拾車公螢古學探奧  
突高文揆天庭善力隨所遇小試常發硎胡為嶺南州  
尚屈摩霄翎人生多離合泛泛如流萍忽焉復邂逅豈  
辭倒公瓶著身山水窟已浣埃壒形況乃家塾間美誦

金少以人卷二  
卷二  
盈客聽頎頎兩孫子玉立此寧馨居然五經笥問歲纔  
十齡詩成使之哦清越公其聆

題泉石軒

過橋忽與平疇對石路鱗鱗蹠蛇背登堂面勢脩竹林  
百疊青瑤襯其外就中新著小軒竒湏乳披崖草樹滋  
蒼牙砭然如虎飲一泓寒碧湛琉璃雪花茗盃浮談席  
欲去冷然生兩腋留詩聊足記歲年更寫軒題號泉石

和劉仲固痛飲四疊

舊詩未酬新句新向來毒醒與死濱頽然一榻誰料理  
子思之側知無人華筵再開不辭醉夜碧千鍾慰愁肺  
盍簪如霧君不來豈念清遊後難繼朱唇少罷凌風歌  
蓮舟小槳翻青羅笛聲無哀亦無怨喚取月色今宵多  
狂時駘蕩醒時恥情景循環亦何已但愁霜過沾人衣  
埭上嘒嘒坐當起

曉乘大霧訪仲固

稚金不耐老火鑄有烈秋陽尚驕倨汗流亭午憶淒風

氣應佳辰欣白露朝來開窗迷眼界霧色無邊莽回互  
誰為夜半有力者竊負羣山著何處却驅滄海白潮來  
濤浪初平不成怒人家慘淡暗漁浦水墨微茫認烟樹  
我行有似江湖雀彼岸應恠浮杯渡從教弱水三萬里  
一棹桃源未迷路忽然五霞漏激射清飈作陣翻空鷺  
渤澥盡輸無極底祖龍枉被徐生誤雲屏儼映蓬嶠轟  
鳳翼騫帶瀛洲嫖連蒼接翠層疊青秀色著絢忘初素  
前觀象罔非夢迷後矚離婁豈驚寤真化自然相隱顯

幻士謬爾生智故有真無幻信誕分此境易透亦難覩  
要知萬理無不定聚散一致此焉悟常記向時聞劇論  
知自少年得真趣風雲變態襟抱開山水之樂仁智具  
胡為顰呻不料理冰炭受坐瘡鬼怖願君讀此一醒然  
未負當年少陵句

題傅氏真意堂

高栴落繁蔭茂竹疏冷風小亭尋丈景已冠一畝宮況  
復哆北楹方池渺溶溶遊儵亦何樂動影相冲融卉木

羅以差想見芳菲容香枝寒月碎雪架春雲濃我來秋  
暮時山葉般般紅乃眷黃金花尚闕東籬叢維君抱材  
氣志通身則窮和壁獻未售夜半光騰虹樂歲突尚冷  
初筵尊未空恨我早病衰不能卷千鍾喜聞滌塵話冰  
壺瑩心胸又知此勝境片溪縈硯峯昔有遺世士烟霞  
眇飛蹤先生儻邂逅問訊為我通芝苗不足飽多謝角  
里翁相期玉京路手把青芙蓉

和彥冲



七載飛電邁百慮秋水澄獨餘故鄉念居然常兢兢同  
是幔亭仙乘風釣湘蒸魚寄水千里歷傳雲萬層十論  
賜甚腆一篇蒙未曾登堂話袞袞寢香凝凝看君道  
氣充可仰誰敢朋寸陰謝尺璧默然耀千燈世路多招  
呼掉首未渠鷹幽尋嘆川逝彼寧記雲騰但願我輩人  
拳拳知服膺聖門無闕轍自畫理豈應君子有所病沒  
身名莫稱虛生既何補浪死誠堪懲君仍詩律高愧我  
酒量能屬耳風雅頌因忘斗與升山林足竒觀朱闌盍

時憑

和彥冲

詩腑五字城酒腸九曲灣興來摧高堅觴至輸潺湲卷  
此山澗曲素緇邀畿寰入境俱寄陶陋巷同樂顏新黍  
釀初熟小槽泣微潛僅堪代湯茗敢望頽玉山獨餘要  
眇音超然難追攀所賴見寬假悲鳴三日間清風又吹  
句玉佩崢瑤環使我發深省迷蕪自除刪得意言語外  
放懷天地間人生貴知心願言長往還

清湖山大火 丁卯

青天露坐月斂昏忽見山燒明溪村轉移胡床飽寓目  
獵獵變態真難論清湖之山峨帝閣盤陀四隕如雲屯  
千章大材翳山黑忽作秋樹繁鮮緼得非祝融張南軍  
周顛漢幟雜邀巡草山奪壁秣且獵陳皮較獲羣毛駢  
又疑棲岩窮道人麤砂灶破寶魄淪丹光飛飛弄明滅  
恠氣閃閃騰輪困隨風廓爆聲何喧遇澗緣絕勢復分  
金虬赭虺怒鬱律紫鳳朱鳥驚翔騫欲尋仙家訪桃源

武陵太守馳雙轡紛敷絳雪土不濕近遠蒸霞山正燃  
離離點點羅星垣燦燦爛爛披纈紋巫陽研朱盡屈曲  
盤印繚燼香氣氤山清宛然大裘尊藻粉之間繡光焯  
侍官服章畫彤韎佩玉環玦皆瓊瑤誰移太華玉井根  
開此翠巘芙蓉園徒勞禪宮詠火傘豈媿花鳥歌紅雲  
連岡槎牙宣空齧缺壑侈哆呀殷唇眉峰胡為變賊赤  
頂髻何事從僧髡翻思元宵遊端門巨鼉反載蓬萊蹲  
蜿蜒雙銜照天炬十萬油蠟爭晨暎只今留滯碶河盤

青熒一燈讀書殘  
楚人亦解相暖熱  
坐使寒谷驚龍鸞  
吁嗟此山美  
崇巒若動若植  
方涵春閩氓力  
耕地無草  
歲歲藝薙  
供犂犉火行于寒  
反行暄忍使秀綠  
餘焦痕  
為翻銀河一洗濯  
回祿雖熾應逃奔  
每欽韓公觀陸渾  
雄詞險句咻而燉  
我猶皇甫燭不息  
看君續焰輝無垠

遊將軍岩

初識後亭山  
一賞北岩秀  
更聞將軍隱  
飛策過雲岫  
何為英烈姿  
石壁寄門竇  
得非馬力竭  
依險聊自救  
無乃

卷二  
弃長弓一念希不漏餘情尚慳滯  
嗔客來徑筵啼雲翳  
凡木涕雨滑峻甃以君智慧鎧與我忠信胄才刃及詩  
鋒勝客雜前後懸崖雖仡仡有進寂寞關山靈方恫悔  
斂迹祈恕宥坐令蒙蔽景倏變清明畫前峯霄漢近  
轟轟駭孫狄絕澗雲練明宛宛出篆籀奇觀固難值  
况復有清耐不須待重九菊蕊已堪嗅

觀柳源瀑布

遐歸獲勝踐風日清廣宙途嶽意未闌景絕願初副  
回

巒豁大壑萬古貯天漏無人識秋河此地一源透鎔銀  
誰戲劇擣玉供噴漱未知三峽橋與此孰雄陋却來據  
盤石雲氣滿襟袖指顧組練軍洶湧出左右八元坐收  
功獨聽九韶奏摧岩決澗手笑我泣寒溜出入更回頭  
雲水莽迷覆歸瓶注小瀑雪乳尚真鬪

題棲雲閣

青山畫出天台障溪流宛是桃源漾一菴深著翠微間  
高閣更摩雲氣上道人於此幾經春七閨不作黃楊屯

孤標如松自磊砢爽氣映竹長清真爐中寒灰與心寂  
世味只今餘好客橫潭一笑得意鮮通道三杯酬螭屐  
願君勿羨飛升天亦莫面壁沉幽禪問雲何心不出岫  
歸與吾黨相周旋

題四畫

清湖驟雨

銀竹森空映湖光莽蒼中不因風捲去那得見沖融

潭溪秋碧



秋容何處佳  
淡泊寄寒水  
無滓湛遙天  
我心正如此

石峯春霽

騰龍紛埜馬  
非霧亦非烟  
心共春山遠  
詩憑淡墨傳

屏山夜雪

熟醉蓮蕩風  
未賞梅溪勝  
踏雪訪屏山  
今年得乘興

陪叔夏遊法輪

戊辰

不雨度十旬  
山行尚清美  
茲晨岫嶺南  
昔者紫蓋尾  
三益伏蒲公  
眷我共遊徙  
晉時雲龍寺  
輝輝千柱啓  
老禪

卷二  
瞻幽思靜室更經始梁檠杉桂馥窗戶水雲洗況逢月  
幾望天宇澹無滓空庭竹柏影藻荇漾流水散衣捧皜  
腹行食躡細履不隨羽人夢當處廣寒裏何須霓裳曲  
梵唄亦不起紛紛共塵世清絕乃有此又嗟情事隔不  
得久棲止人生誰定問吾行未云已

賦向宣卿有裕堂堂在伊山桓伊舊隱也

仕進行所志退居適吾情本無顛暝患那有得失驚想  
彼貪者狼跋蹙不少寧又哀觸藩羝兩角掛紫荊君子

但居易肯與世轍爭彼以戚戚終我以坦坦生斯堂誰  
所築向公勇且英百鍊見剛質千尋抵孤清藝蘭畹畹  
滋栽竹箇箇成無復笛三弄只聞絃誦聲客來引壺觴  
客去山崢嶸咄哉狙詐兒夸眩機巧呈挪揄復挪揄鏡  
空難遁形天命有通塞況公負時名唐濟嗣先業選掄  
待揚庭一朝看遊刃光芒發新硎十步即千里紫氣無  
留行青蠅失榛棘周道如砥平

以墨一品餉叔夏

人墨兩相磨此語昔賢嘆平生幾兩屐何用積不散未  
忘文字耳四寶且同案陶泓有潤澤毛穎稱詞翰論交  
楮先生相厚不相貫直須造玄默乃可發三粲南山太  
古松盈壑凌霄漢煤珠貴輕遠膠結要堅捍脩圭及圓  
餅脫手千金煥寄君亦何意往作文房伴君子萬卷讀  
胸次春水泮翻水即千篇熒若雲錦爛獵華將食實以  
道自澡盥當年伏蒲疏慨欲排世難民瘼今益深山谷  
寧可玩請君携此寶慎勿比鑿炭恭惟上隆寬繕寫臣

謹按當從黝然處凜有光芒觀繼君諸皇祖勲德侑清  
裸

和諸友春雪

蟄蟲恰好雷聲發更聽陽春歌白雪仙葩亂墜絮繽紛  
竒韻相高山竅絕筆尖不為風力退酒面肯作冰漸冽  
千林萬木絢華滋玉李銀桃幾時結不將瑤草充大藥  
獨愛浮筠凜高節天公憫世緇塵土故使萬穢蒙一潔  
涵濡之力啓豐登后稷資為天下烈手寒固已懶搏玩

齒病那敢夸嚼齧清歡悵然懷舊賞白戰漫爾踵前哲  
却欣淑氣掃餘寒杲日當天不勞揭

上元寄向令豐之

雪罷梅殘烟柳浮上元燈火春風柔紅蓮萬枝開岳縣  
比似河陽花定羞官松有明不敢斫烏臼作燭供清愁  
君能分光到蝸舍為遣華星三百毬

贈邢子友

憶昔筮仕初典教洛學省故家多遺俗往叩冠屢整得

交邢公子伯仲皆豪穎湖園萬竿竹伊水注深靜藤林  
與花鳥轉步即殊景梅臺更稱奇雲玉粲寒耿官間日  
從君何宴不酩酊每聞魁偉論雖醉灑然醒尋幽訪古  
徑並轡緩無騁向來春風鬢忽忽雪飄頸三川在何處  
會合乃潭永久要見襟抱意態謝炎冷顧予哀懦質酬  
答忘形影泛舟三百里念我特相省酒酣據劇論壯氣  
尚雄猛樂將高歌發忠以微語警豈無一可恨不肯破  
空境石壇夜焚香岩寺朝供茗相逢多譏評墨守卒未

金剛經疏 卷二  
領湘流平似席告別理歸艇願言頻惠音庶以代效馨  
它年當扣門此話欲重請

示法輪宗覺

身如槁木藏春色眼似澄江映秋碧洞庭湖上月同圓  
石廩峯前人不識從來說法鬧雲林直指人心定難得  
豈關佛運有窮通自是擔肩無贅力看君古井且浪盡  
閱世空花等塵寂雖然獨飯一盃香爭似分甘千百億

仁仲小圃



白雲不為輕風起，閒影融融映秋水。靜中觀物萬象呈，  
借問此心何所始。蚊飛蠓過那足問，要識人生行樂耳。  
君開小圃富幽致，自外而觀如畫裏。陶公高興只柴桑，  
晏子之居徒近市。春歸森森青竹上，秋盡離離從草靡。  
歲華流轉只常在，月魄盈虧未嘗死。經綸胸次自開泰，  
語笑尊前即傾否。君知消息何處來，於穆我師純不已。  
人日驚蟄前數日大雪寄孫奇父韓叔夏

臘雪不溉旱天公，念嘉生稚春乃祁寒號。令如冬行粟

烈鼓噫氣碎，訇動霆聲初。疑雨翻盆旋，覺散灑豐暫。止  
俄并集中，宵遽開明衾。裯起稜角屏，幌同戶楹。浙浙紙  
窗戰，鏘鏘銅漏驚。雞寒罷曉唱，鴉凍猶晨鳴。驚戒臧獲  
起，吹噓燎爐頰。開闔醉魂醒，倚杖詩思清。便欲披鶴氅，  
豈思飲銀鐙。空濛勢轉盛，飛舞祥爭呈。月池方漫汗，潮  
山正崢嶸。詎應柳昏絮，却訝梅始英。荆璞羞自獻，藍田  
遣誰耕。塵埃爭受洗，糞壤叨蒙榮。辛巳陘巘寧，若為投  
澗坑。分功雨露澤，絢綵冰霜精。良足潤麥麩，未能浹梁

抗經旬苦料峭三日觀熒晶恍惚遊汴洛都忘在相衡  
瑤林鄙王衍冠玉懷陳平亦念袁邵公長安門自撐更  
奇李侍中淮蔡功先成漸喜雲解駁頰瞻日舒晴昂然  
秀松出條爾危檐傾牆角僅委積瓦溝那持盈朝暎破  
凝泣淑氣蘇鰥笮斷決岡隴色斬餘白蛇橫泮流溪谷  
響擊碎珊瑚瑋瓶去蚌珠餐庭空獅子獐粉圖記姿態  
不屑供使令陡覺時序正不令寒溫爭水泥就涸澁卉  
木紛勾萌蓓蓓弄池柳煌煌然山櫻了無半面粧強學

六出雲二老久不覩千篇諒難評羔醪忍獨酌鳳茗宜  
同烹或且放筆快敢言當敵勅木桃得瓊玖耳屬長謠  
賡

送智京長老智京普融上足也

人生如浮雲片片隨所起值遇初偶然解散亦俄爾識  
君湘水頭凝袂衡嶽裏十年去何住新化五百里乘興  
出山來相對淡無滓因思相見初賊幟森未弭世事幾  
秋葉壯懷今止水堂堂普融老鶴瘦松孤峙廣舌浩江

輸迅機無箭擬八請六道場到處萬人喜一燈千百焰  
高第君得髓法席既紹隆詩鳴亦能似衡門鮮晤語杖  
錫盍留止翩然復告辭母病急甘旨故知秉彛性誰或  
外此理為話本來心聞聞即彈指

示端推單普

辛未

我是瘴嶺跣誰為青田真若使新羽燕老鷹安得親君  
行何方來袖有三吳雲訪予墮珠玉蟄戶開青春無以  
答嘉贈深衷宜重陳仲尼且待賈至寶宜貴珍

謝楊珣梅栽 壬申

卷二

南梅土不貴往往薪樵束倖然傍寒廳久亦未見錄牆  
隈非所恨自可凌冬發奈何瑤臺伴辱近紫姑闈佳人  
雖薄命時運忽來復一朝蒙閔嘆移近東家屋孤根便  
靜深池上映天碧我為渠主人梅是先生客且須創幽  
榭賸與種脩竹炎荒無雪片且對冰花馥西施佩生麝  
姑射步微月何當見舊官應使中腸熱

贈陳生

茅容殺一雞留半置庖板奉親須肉味對客但蔬飯仲  
由身負米豈顧人嗤莞參乎三釜樂不羨千金產古今  
履誠信薄俗行苟簡競敲聲利闕汲汲組綬綰指茲為  
顯榮于義遑復揀賢如郭林宗尚負牲牢報孝哀百行  
失豈特厚賓饌為人在我爾誰以力自限今君修古道  
田土亦未畝帶經已能克扶耒意無擱似聞收一稔鉅  
艾工日儻茂筠為載具泛壑出巉嶮歸家魚菽美愉婉  
已在眼君非沮溺流文字富編撰中局務恬息外慕正

除剗晚交慰荒蕪切磋兼瑟憫何時還過我望望車有  
棧梅花開正繁飛雪待浮盞

簡黎生生時旅寓郡庠

雨多杖藜阻室邇言少賒示病今如何起居諒能佳小  
市禁宰割每無魚與蛙何以侑旅食頃當羹菹茹在昔  
多貧師況自接東家藥物有所缺諭我心莫遐明日能  
相遇煮茗看荷花

和蔡生



吾生慚松獨天賦比樗散學道纔窺藩聖門未容款老  
來憂患集離草經濕曠衣帶垂有餘樗腹無可坦蹉然  
喜君至肯就我乎館一醉老瓦盆寧用玻璃盃春風正  
駘蕩柳暗月欲滿蚩蚩萬物類混化胎與卵吾儕幸襟  
靈詩書足相伴浩然天宇內未暇論脩短揚雄正希顏  
曾子豈顧管希聲非折楊下士每大莞

送張倩歸衡嶽

癸酉

鄙人麗丹書分合墮荒香玉郎胡為來高誼雲共眇一

年常惜日四序乃過烏安能久相留話別情太悄離筵  
亦何有瘴雨對蠻醪羞以蛙與蛇茹以芹及蓼相將丹  
荔熟悵望剝絳皎愛君溫克姿不被歡伯繞緬懷君祖  
烈德粹學甚窈乃翁才情富未試嗟折天早交論金蘭  
晚契託蘿蔦顧慚兼金贈聊用苦語曉發身在求仁此  
理悟者少人雖處塵世心盍度塵表凌霄而俛睨萬物  
孰不小規模要宏廓聞見忌寡護南方君子居吾敢廢  
強矯勿興兒女戀後會龜已兆千山空稜層萬水自滌

渺行行得夷路長轡策驪褭

邀朱推單令周尉賞西隣  
埜人屋前梅花次單令

韻

西崦一株梅在野何清麗  
遙知不是雪香散青林際  
肆筵賓沓來秉炬僕相遞  
幸蒙五字詩妙敵一言蔽  
便恐清夜闌行酒莫濡滯  
莓苔何必掃月地作瑤砌  
細蕊護檀心已帶輕酸味  
為語青裙嫗斤斧煩叱衛  
會有移根人趁得春風至  
顚顚調君羹年年映塵世  
來遊者誰子

此興恐難繼

周尉不來用單令韻見寄和之

穠李太穠華天桃苦天麗不如姑射子仙質淡難際破  
寒傳芳信春意豈迢遞亭亭映碧霄茨屋安得蔽一壺  
掃花陰聊散客愁滯千珠聯萬玉襞積誰所砌飛英時  
落盃草木吾臭味頗嫌三弄笛聲雜鄭和衛二公何惠  
然悵望周郎至哦詩要何似孤絕表一世風吹佳句來  
端可使人繼

示周尉 甲戌

官酒不可求，村釀不足酌。似聞糟床注，滴瀝真珠露。載  
醪欲相過，好語亦已屢。梅花雖零落，殘雪尚可顧。已捉  
籠中雞，仍擷園中茹。一壺便堪醉，不必更携具。數朝風  
雨濕，兩日已通路。行樂貴及時，蟋蟀歲云暮。

題單令雙清閣

中烏有天遊，一室四海見。倘無空虛地，六鑿互爭戰。琴  
堂故蕭爽，向也正牆面。棘茨莽蒙蔽，鼯鼠紛旋轉。剗除

資谿達頓覺雲水眩瞰臨幽閣出率畧重營繕從容五  
六客尚得搃歌扇西山隔雉樓佛髻三兩現渺然宜北  
望深碧湛芳菡羣峰湧翠浪遠邇相明絢珍禽知幾種  
演漾花雪片有時惠風來輕皺感霜練最憐明月夜酒  
渴光可咽主人藹優政不媿宓子賤撓之莫能濁聊用  
青白燕心澄迹自潔眼靜照還徧他年騰踏去回觀等  
郵傳只今簷前淥但足注詩硯予方混泥塗每媿陪高  
宴更書梁棟間何以賁花縣

贈朱推

淨綠環城亦何有  
跳錦潛銀不容取  
尚餘翠蓋擁紅粧  
兩兩三三早秋後  
秋官公解臨池傍  
結筠為筏開軒窗  
落日輕風泛船好  
歡呼取笑徒相望  
忽聞報子酒初熟  
亟往從之傾白玉  
疎蟬有思曳長綵  
寒露無聲洗殘燠  
君才豈合州縣勞  
前雲後暉家世高  
一經不但有遺訓  
千古記注談滔滔  
新州州土烝嵐瘴  
從來只是居流放  
於今多住四方人  
況復為官氣條暢  
山肴野蔌應時須

真率相期久已渝君今滿秩稍淹此牛刀又欲將雞屠  
嗟予哀謝人所去晚交幸作年家遇浮生聚首安得常  
一笑傾懷亦難屢莫辭瓶罄燭再然異日重逢歌此篇  
歲時豈忍無記述明朝仲朔青龍年

題蔡生竹裏茅簷似楚航

誅茅自結林中屋林密先刪百竿竹南山獻狀漏南亭  
北路行歌喧北曲誰知江海蔡中郎歲晚栖栖泊嶺陽  
未有淨名方丈室小齋聊寄錦江航勸君須學逃名隱



題揭徒然絢黛粉請看鄭圃四十年妙在不知而不愠  
我今亦住茅竹間身世渾如繫纜船空洞之中何所有  
聖門勲業浩無邊此君且伴幽人趣時來豈不茅連茹  
瓶壘果醉兩三人會約伊渠杖藜去

求木礎于周尉

春簸精粗期適口老夫脫粟艱難久它山木臼纔百金  
四市營求輒無有願惟仁者試吐嗟要使赤脚治勝斗  
豈惟軟飯慰無牙亦冀糠粃及雞狗

同蔣德施諸人賞簡園梨花

君不見韓退之招喚劉師命醉賞長安西郭梨青天白  
日交相映豈料炎荒中好事如簡翁彫冰剪玉春不融  
二十五樹高籠松風流八仙携草具輕陰閣雨相隨去  
朝同去暮同歸回頭翠微明日玉花飛

畫馬


曹霸丹青徹馬骨應師伯樂遺毛物請看此圖筆外意  
萬里人寰定超越

畫牛

江上春犁雨當年力共強只今對圖畫臧穀兩亡羊  
牧子鞭繩急防渠犯苗稼人人白水枯豈必為山下

題勝業悅亭

欲結衡山茅未買脩竹徑杖藜借危亭面勢五峯正  
何人縱惡木牆外巧翳映揮斤快望眼岳色涵空鏡連岫  
忽生雲又厄登臨興吹開指顧間獨立西風勁天機進  
人事衆定兩相勝不競獨此心萬象同一瑩



斐然集卷二